

平定兩金川方畧

二
九

平定兩金川方略

二五

平定兩金川方畧卷之七十七

十月癸巳。郝碩奏言。

臣

自抵軍營後。於糧運事

宜。留心體察。兼由木坪一帶。直至雅州。親歷沿

途各站。察看情形。查自辦理軍務以來。所有原

派官商。辦運各路兵糧。截至本年正月止。已幾

至一百萬石。從前派辦之米。皆已陸續到營。隨

時銷用。惟聞敘州府承辦招商領運米八萬石。

尚未交清。經該府將各商拘押。雖已將運腳銀
追出數萬兩。下欠尚有二十餘萬兩。非特於糧
運無益。且於

國帑有關。請

旨飭交督臣將川省新舊派運各路糧石徹底清查

分別已完未完。及有無已領未運情弊。詳細核
明。據實奏

聞至前項米石。所以遲延之故。實因派運之初。向未
嚴定期期。以致漫無約束。臣請嗣後辦運軍米。

數在一萬石以上者。定限三箇月。五千石以上
者。定限兩箇月。俱令於奉文之日起限。務須限
內掃數交清。並令將起運及運竣日期。隨時申

報各該路

欽差。暨該總理司道。以憑查核。並請

勅下該督臣。於每次派運限期已滿之後。將各屬已
未運完。分別清查彙奏。如逾限未完。卽行指名
叅處。如此立定章程。在承辦之員。知顧考成。不
敢任意延緩。卽督催之員。亦便於稽察。且經一
番清釐之後。庶糧石得歸實用。帑項不致虛糜。
指日大功告成。於造銷事宜。亦不無裨益。

同日文綬奏言京兵第八九十起內五百名已

照將軍阿桂指派。撥赴南路。其第十起內健銳營兵一百名。准阿桂咨令侍衛特成額帶赴西路。亦已起程。所有京兵二千已全數過省。其吉林兵頭起。於九月二十五日抵成都。照咨將先到五百名。撥赴南路。現在料理起程。查自京兵第八起之後。各省兵過竣。專辦滿兵。每間二日。僅送一起。且又分赴兩路。其續調楚兵三千名。

尚未入川。此時沿途站夫。往返送差。得有空口。
臣預飭各臺站。將滾運之米。乘此儘力趕運。以
供沿站口糧。且夫力亦不致間曠。至吉林黑龍
江。均以三百名爲一起。現在口內口外站夫。寬
備足用。軍行更爲便利。均奏入。

上諭軍機大臣曰。從前招商領運。原以佐官運之有
所不及。但運費旣多。自應核計程站糧數之多寡。

或先酌給一半。俟到站交清後隨時找足。若衆商分頭領運。並須逐名酌給。俾其清交轉運。核實稽查。庶不致拖欠滋弊。豈有將應運八萬餘石之運脚。盡數給商。迄今已逾一載。竟至拖欠二十餘萬兩之多。是前此所辦。漫無頭緒。已可槩見。不可不徹底查辦。妥定章程。著傳諭富勒渾文綬。卽照郝碩所奏情節。查明承辦貽誤各員。據實嚴叅。所有

未交糧石運價銀兩亦卽上緊勒追。如竟查無著落。卽於辦理不善各員名下著追。並將各路新舊派運糧石分別已完未完。及有無已領未運等項情弊。迅速催追查辦。並將何人任內承辦。查明分別叅奏。至所稱嗣後運辦軍米。定限清交之處。自應如此辦理。尋常案件。尚有限期。況緊要軍糈。豈可漫無定限。一任拖延之理。並著該督將此後如

何定數發交銀兩及如何定限催運。一并詳議速奏。又據文綬等奏。京兵陸續出口。預飭各臺站。將滾運之米。乘時趕運。俾夫力不致空閒等語。所辦亦屬妥協。惟昨據阿桂奏。日隆舊存兵丁。本省所辦軍裝器械。尚未全到。黔兵所解衣履。亦因川省轉遞遲滯。未抵軍營。現在卽需進兵收復小金川。所有軍裝器械等項。甚關緊要。並著文綬速飭各

站嚴催速解。以供應用。並將飭催抵營日期。先行覆奏。

同日郝碩又奏言。查西路大兵雲集。到齊之後。連跟役人夫。每日計需口糧三百餘石。一月之間。必得米一萬石。始敷支放。雖現在派運日隆。達木巴宗二處之米甚多。然由灌縣桃關一帶。直運軍營者。十居八九。而滿漢官兵應撥赴西。

北二路者。俱由此一帶行走。兵差與糧運同途。卽恐不無壅阻。查中路自雅州木坪一帶。直至達木巴宗。程站較近。旣不過兵。輓運頗稱便捷。現在夫價居奇。商情退縮。如招商認運等項。俱不足恃。惟於督臣奏准各屬採辦之三十萬石。內撥出二萬石。飭交雅安蘆山。天全等三州縣。照商運價脚數目。支領銀兩。在附近地方上緊

採辦卽雇用本地民夫。由木坪直運達木巴宗。
勒限三月。務於年內掃數交清。則承辦州縣各
有責成。既可剋期必至。而以民代商。腳價充餘
人夫亦所樂從。且以本地之夫。運本官承辦之
糧。行走熟習。路徑較爲迅捷。再查自省由木坪
運至達木巴宗。每米一石。計需價腳十一兩八
錢五分。西路自省由桃關運至達木巴宗。每米

一石計需價脚十三兩八錢五分。是中路運脚較之西路。每石可節省銀二兩。而程站稍近。尤可易於催趲。奏入。

上嘉之。

同日。郝碩又奏言。

臣

於九月初六日。自日隆起

程。前赴木坪。道經達木巴宗。查該站現存米一

千六百石。

臣

卽挨站督催。於初十日抵木坪後。

查該處存站糧米尚有一千五百餘石。若僅令該站人夫逐日滾運。勢難迅速。臣因飭糧員葉

道治就近於天全、蘆山等處雇夫一千名。限半

月內務將存米全數直運達木巴宗。臣隨於十

三日赴雅州。查催知府李永祺承辦達木巴宗

米一萬石。據報已起運米三千五百二十五石。

其餘現飭趕運。務於十月內運竣。旋據達木巴

宗日隆二站開報。截至九月十五日止。已共存糧九千餘石。此外再得長運米石。隨時運供。自可無虞缺乏。奏入報。

聞。

同日。文綬又奏言。火藥爲軍旅先資。自征勦金川以來。需用浩繁。本省硝斤。經臣於上年七月間。奏明設法採辦。迄今計共獲硝四十餘萬斤。